



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

02.10.2020թ.

Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ԱՑ-ԼՕ-2020/215

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ Երևանի քաղաքապետարան
Մասնակից՝ «Տ-Քնսթրաքշն» ՓԲԸ

Գնման ընթացակարգի ծածկագիրը և առարկան՝
«ԵՔ-ԳՀԱՇՁԲ-20/118» ծածկագրով գնանշման հարցում, Երևան քաղաքի Մալաթիա-
Սեբաստիա վարչական շրջանի բակերի բարեկարգման աշխատանքների ձեռքբերում

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 18.09.2020թ.-ի թիվ 26/26-1/14150-2020 գրությամբ «Տ-
Քնսթրաքշն» ՓԲԸ-ին (այսուհետ՝ նաև Մասնակից) գնումների գործընթացին մասնակցելու
իրավունք չունեցող մասնակիցների ցուցակում ներառելու նպատակով նախաձեռնված
ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը.

ՀՀ ֆինանսների նախարարությունը, Երևանի քաղաքապետարանի 18.09.2020թ.-ի թիվ 01/61-17444 գրության հիման վրա, 18.09.2020թ.-ին «Տ-Քնսթրաքշն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 18.09.2020թ.-ին:

18.09.2020թ.-ին կայացված որոշմամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ, տրվել թիվ ՍՑ-ԼՕ-2020/215 համարի ծածկագիրը և նույն օրը հրապարակվել է www.gnumner.am կայքում:

25.09.2020թ.-ին և 02.10.2020թ.-ին նշանակվել և հրավիրվել են նիստեր:

Գործի քննությունն ավարտվել է 25.09.2020թ.-ին և Բողոքներ քննող անձի որոշման հրապարակման օր է նշանակվել 02.10.2020թ.-ին:

2. Երևանի քաղաքապետարանի ներկայացրած փաստերը և դիրքորոշումը.

Երևանի քաղաքապետարանը 18.09.2020թ.-ի թիվ 01/61-17444 գրությամբ դիմել է ՀՀ ֆինանսների նախարարությանը՝ հայտնելով հետևյալը.

«Գնումների մասին ՀՀ օրենսդրությամբ սահմանված կարգով Երևանի քաղաքապետարանի կողմից կազմակերպված «ԵՔ-ԳՀԱՇՁԲ-20/118» ծածկագրով գնման ընթացակարգին մասնակցության հայտ է ներկայացրել «Տ-Քնսթրաքշն» ՓԲԸ-ն (այսուհետև՝ Մասնակից):

Ընթացակարգի շրջանակներում Մասնակցի կողմից ներկայացված հայտում արձանագրվել է անհամապատասխանություն հրավերի պահանջների նկատմամբ:

«Տ-Քնսթրաքշն» ՓԲԸ-ի կողմից ներկայացված բանկային երաշխիքի մեջ (հայտի ապահովում) նշված է, որ այն գործում է մինչև 28.12.2020 թվականը ներառյալ, այն դեպքում, երբ հայտի ապահովումը պետք է վավեր լինի հայտը ներկայացնելու օրվանից (28.08.2020 թվական) հաշված 90 (իննսուն) աշխատանքային օր:

Գնահատող հանձնաժողովը ղեկավարվելով «Գնումների գործընթացի կազմակերպման մասին» ՀՀ կառավարության 526-Ն որոշմամբ հաստատված կարգի /այսուհետև՝ Կարգ/ 41-րդ կետի պահանջով՝ ծանուցել է Մասնակցին մեկ աշխատանքային

օրվա ընթացքում շրկել անհամապատասխանությունը: Մասնակցի կողմից շրկվել է արձանագրված անհամապատասխանությունը, սակայն մեկ օր ուշացումով և գնահատող հանձնաժողովը ղեկավարվելով Կարգի 42-րդ կետի պահանջով՝ մերժել է Մասնակցի կողմից ներկայացված հայտը, որը հանգեցրել է գնման գործընթացին վերջինիս հետագա մասնակցության դադարեցմանը:

Վերոգրյալ իրավական հիմքերով պայմանավորված՝ ղեկավարվելով «Գնումների մասին» օրենքի 6-րդ հոդվածի 1-ին մասի 2-րդ ենթակետով, առաջարկում եմ Մասնակցի նկատմամբ կիրառել Օրենքի 50-րդ հոդվածի 7-րդ մասի 2-րդ կետով սահմանված դրույթը»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ԵԲ-ԳՀԱՇՁԲ-20/118» ծածկագրով հայտարարված գնման ընթացակարգի շրջանակներում «Տ-Քնսթրաքշն» ՓԲԸ-ի տվյալները՝ համապատասխան հիմքերով:

3. «Տ-Քնսթրաքշն» ՓԲԸ-ի ներկայացրած փաստարկները և դիրքորոշումը.

Բողոքներ քննող անձը 18.09.2020թ.-ին գրությամբ դիմել է «Տ-Քնսթրաքշն» ՓԲԸ-ին՝ հնարավորություն տալով ՀՀ ֆինանսների նախարարության կողմից 18.09.2020թ.-ի թիվ 26/26-1/14150-2020 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, չի ներկայացել հրավիրված նիստին:

Մասնակիցը 24.09.2020թ.-ին թիվ ՏԲ-0690/20 գրությամբ հայտնել է հետևյալը.

«Ինչպես Ձեզ հայտնի է, որ ներկայումս քննարկվում է Երևանի քաղաքապետարանի կարիքների համար «ԵԲ-ԳՀԱՇՁԲ-20/118» ծածկագրով գնման ընթացակարգի արդյունքում «Տ-Քնսթրաքշն» ՓԲ Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՑ-ԼՕ-2020/215 ընթացակարգի քննությունը, որի առաջին նիստը պետք է տեղի ունենա 25.09.2020թ.-ին 12:00-ին, սակայն միևնույն ընթացակարգի շրջանակներում ընթանում է նաև «Տ-Քնսթրաքշն» ՓԲ Ընկերության կողմից ներկայացված բողոքի գնումների հետ

կապված բողոքներ քննող անձի ԳԲՔԱ-ԼՕ-2020/94 ընթացակարգի քննությունը, որի վերաբերյալ առաջին նիստը տեղի է ունեցել 23.09.2020թ.-ին:

Ելնելով վերոգրյալից, խնդրում ենք հետաձգել ՍՅ-ԼՕ-2020/215 ընթացակարգի քննության առաջին նիստը, մինչև ԳԲՔԱ-ԼՕ-2020/94 ընթացակարգի քննության ավարտը և երջինիս վերաբերյալ համապատասխան որոշման կայացումը:»:

4. ՍՅ-ԼՕ-2020/215 ընթացակարգի քննության համար էական նշանակություն ունեցող փաստերը.

Սույն գործի քննության համար էական նշանակություն ունեցող փաստերի համաձայն՝

i. Երևանի քաղաքապետարանի (այսուհետ նաև՝ Պատվիրատու) կողմից Երևան քաղաքի Մալաթիա-Սեբաստիա վարչական շրջանի բակերի բարեկարգման աշխատանքների ձեռքբերման նպատակով 21.08.2019թ.-ին հայտարարվել է «ԵՔ-ԳՀԱՇՁԲ-20/118» ծածկագրով գնանշման հարցման ընթացակարգ (այսուհետ նաև՝ Ընթացակարգ):

ii. Ընթացակարգին մասնակցելու նպատակով 28.08.2020թ.-ին հայտ է ներկայացրել նաև «Տ-Քնսթրաքշն» ՓԲԸ-ն:

iii. Ընթացակարգի գնահատող հանձնաժողովի (այսուհետ նաև՝ Հանձնաժողով) 28.08.2020թ.-ի նիստի թիվ 2 արձանագրության համաձայն՝ գնահատող հանձնաժողովը հայտերի բացման և գնահատման ընթացքում հրավերի պահանջների նկատմամբ արձանագրել է անհամապատասխանություն, մասնվորապես՝ «Տ-Քնսթրաքշն» ՓԲԸ-ի կողմից ներկայացված բանկային երաշխիքի մեջ նշված է, որ այն գործում է մինչև 28.12.2020թ.-ը ներառյալ, այն դեպքում, երբ հայտի ապահովումը պետք է վավեր լինի հայտը ներկայացվելու օրվանից հաշված 90 (իննսուն) աշխատանքային օր:

iv. Հանձնաժողովը՝ ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի 41-րդ կետի համաձայն, որոշել է կասեցնել նիստը և առաջարկել Մասնակցին մեկ աշխատանքային օրվա ընթացքում շտկել առկա անհամապատասխանությունը: Սահմանված ժամկետում անհամապատասխանությունը չշտկելու դեպքում հայտը կգնահատվի անբավարար և կմերժվի:

v. Հանձնաժողովի 03.09.2020թ.-ի նիստի թիվ 3 արձանագրության համաձայն՝ «Տ-Քնսթրաքշն» ՓԲԸ-ն 31.08.2020թ.-ին ծանուցվել է առկա

անհամապատասխանությունը շտկելու վերաբերյալ և մինչև ս.թ սեպտեմբերի 1-ը պարտավոր էր շտկել անհամապատասխանությունը: Սակայն «Տ-Քնսթրաքշն» ՓԲԸ-ի կողմից շտկված փաստաթղթերը ներկայացվել են 02.09.2020թ.-ին, ժամը 10:59-ին: Հետևաբար, ՀՀ կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի 42-րդ կետի համաձայն, եթե մասնակիցը սահմանված ժամկետում չի շտկում առկա անհամապատասխանությունը, ապա հայտը գնահատվում է անբավարար և մերժվում է:

Հաշվի առնելով վերոգրյալը, Հանձնաժողովը որոշել է «Տ-Քնսթրաքշն» ՓԲԸ-ի հայտը մերժել և հաղթող (ընտրված) մասնակից ճանաչել հաջորդաբար տեղ զբաղեցրած մասնակցին:

vi. «Տ-Քնսթրաքշն» ՓԲԸ-ի կողմից Երևանի քաղաքապետարանի կողմից հայտարարված «ԵՔ-ԳՀԱՇՁԲ-20/118» ծածկագրով գնանշման հարցման ընթացակարգին մասնակցության հայտ ներկայացնելիս՝ որպես հայտի ապահովում, գնահատող հանձնաժողովին է ներկայացվել «Հայբիզնես» ՓԲԸ-ի կողմից 26.08.2020թ.-ին տրամադրված թիվ 854-48 բանկային երաշխիքը (այսուհետ նաև՝ Երաշխիք), որի համաձայն՝ երաշխիքը գործում է հայտ ներկայացնելու օրվանից մինչև 28.12.2020թ.-ը ներառյալ:

vii. «ԵՔ-ԳՀԱՇՁԲ-20/118» ծածկագրով գնանշման հարցման ընթացակարգի հրավերի (այսուհետ նաև՝ Հրավեր) թիվ 2 հավելվածով նախատեսված աշխատանքների կատարման օրացուցային գրաֆիկի համաձայն՝ աշխատանքների կատարման ժամկետ է սահմանվել պայմանագիրն ուժի մեջ մտնելուց հետո 60-րդ օրացուցային օրը ներառյալ:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 18.09.2020թ.-ի թիվ 26/26-1/14150-2020 գրությամբ «Տ-Քնսթրաքշն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է մերժման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» ենթակետի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

Օրենքի 32-րդ հոդվածի 1-ին մասի համաձայն՝ մասնակիցը հայտով, հրավերով սահմանված պահանջով ներկայացնում է հայտի ապահովում, որի չափը հավասար է հայտով առաջարկվող գնի մինչև հինգ տոկոսին: Հայտի ապահովումը ներկայացվում է միակողմանի հաստատված հայտարարության՝ տուժանքի կամ բանկային երաշխիքի կամ կանխիկ փողի ձևով: Կանխիկ փողի ձևով ներկայացված հայտի ապահովումը պահվում է լիազոր մարմնի անվամբ բացված գանձապետական հաշվում:

ՀՀ կառավարության 04.05.2017թ.-ի թիվ 526-Ն որոշմամբ (30.07.2020թ.-ի թիվ 1275-Ն փոփոխություններով) հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 1-ին ենթակետի «ե» պարբերության համաձայն՝ հրավերով նախատեսվում է նաև, որ մասնակիցը հայտով ներկայացնում է հրավերով նախատեսված դեպքերում հայտի ապահովում: Եթե հայտի ապահովումը ներկայացվում է բանկային երաշխիքի ձևով, ապա գնման ընթացակարգն էլեկտրոնային եղանակով կազմակերպված լինելու դեպքում ներկայացվում է երաշխիքի բնօրինակից արտատպված (սկանավորված) տարբերակը՝ պայմանով, որ դրա բնօրինակը գնահատող հանձնաժողովին ներկայացնում է մինչև հայտերի ներկայացման վերջնաժամկետը լրանալուն հաջորդող աշխատանքային օրվա Երևանի ժամանակով 17:00-ն՝ ուղեկցող գրությամբ:

Կարգի 40-րդ կետի 4-րդ ենթակետի համաձայն՝ հայտերի բացման և գնահատման նիստում հանձնաժողովը մերժում է այն հայտերը, որոնցում բացակայում է գնային առաջարկը, կամ եթե այն ներկայացված է հրավերի պահանջներին անհամապատասխան, բացառությամբ սույն կարգի 41-րդ կետով նախատեսված դեպքի:

Կարգի 41-րդ կետի համաձայն՝ եթե հայտերի բացման և գնահատման նիստի ընթացքում իրականացված գնահատման արդյունքում մասնակցի հայտում արձանագրվում են անհամապատասխանություններ՝ հրավերի պահանջների նկատմամբ ներառյալ այն դեպքերը, երբ հայտում ներառված՝ Հայաստանի Հանրապետության ռեզիդենտ

հանդիսացող մասնակցի կողմից հաստատված փաստաթղթերը կամ դրանց մի մասը հաստատված չեն էլեկտրոնային թվային ստորագրությամբ, ապա հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով ծանուցում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Վերոգրյալ իրավակարգավորումների լույսի ներքո, Բողոքներ քննող անձը փաստում է, որ մասնակիցը ներկայացնում է հրավերով սահմանված կարգով հայտ, որը ներառում է մասնակցի կողմից ներկայացված դիմում-հայտարարությունը, գնային առաջարկը, հրավերով նախատեսված այլ փաստաթղթեր (տեղեկություններ): Ընդ որում, Կարգի 41-րդ կետը ուղղակիորեն սահմանում է արձանագրված անհամապատասխանությունը շտկելու անթույլատրելիություն հայտում ներառվող միայն գնային առաջարկի համար, այն էլ՝ որոշ բացառություններով: Սույն կետի իմաստից բխում է, որ մնացած բոլոր դեպքերում հանձնաժողովը մեկ աշխատանքային օրով կասեցնում է նիստը, իսկ հանձնաժողովի քարտուղարը նույն օրը դրա մասին էլեկտրոնային եղանակով տեղեկացնում է մասնակցին՝ առաջարկելով մինչև կասեցման ժամկետի ավարտը շտկել անհամապատասխանությունը:

Հայտերի գնահատումն իրականացվում է հրավերով սահմանված կարգով և հրավերով նախատեսված պայմաններին չհամապատասխանող հայտերը գնահատվում են անբավարար և մերժվում են, ներառյալ եթե մասնակիցը մինչև հայտերի ներկայացման վերջնաժամկետը լրանալուն հաջորդող աշխատանքային օրվա Երևանի ժամանակով 17:00-ն գնահատող հանձնաժողովին չի ներկայացնում հայտի ապահովման բնօրինակը:

Վերոգրյալ իրավանորմերի համալիր վերլուծությունը՝ գործով հաստատված փաստերի գնահատմամբ, թույլ է տալիս եզրակացնել, որ Երևանի քաղաքապետարանի կողմից Երևան քաղաքի Մալաթիա-Սեբաստիա վարչական շրջանի բակերի բարեկարգման աշխատանքների ձեռքբերման նպատակով 21.08.2019թ.-ին հայտարարված «ԵՔ-ԳՀԱՇՁԲ-20/118» ծածկագրով գնանշման հարցման ընթացակարգին մասնակցելու նպատակով 28.08.2020թ.-ին հայտ ներկայացրած «Տ-Քնսթրաքշն» ՓԲԸ-ն որպես հայտի ապահովում, գնահատող հանձնաժողովին է ներկայացվել «Հայբիզնես» ՓԲԸ-ի կողմից 26.08.2020թ.-ին տրամադրված թիվ 854-48 բանկային երաշխիքը, որի համաձայն՝ երաշխիքը գործում է հայտ ներկայացնելու օրվանից մինչև 28.12.2020թ.-ը ներառյալ:

Հանձնաժողովի 28.08.2020թ.-ի նիստի թիվ 2 արձանագրության համաձայն՝ գնահատող հանձնաժողովը հայտերի բացման և գնահատման ընթացքում հրավերի պահանջների նկատմամբ արձանագրել է անհամապատասխանություն, մասնավորապես՝

«Տ-Քնսթրաքշն» ՓԲԸ-ի կողմից ներկայացված բանկային երաշխիքի մեջ նշված է, որ այն գործում է մինչև 28.12.2020թ.-ը ներառյալ, այն դեպքում, երբ հայտի ապահովումը պետք է վավեր լինի հայտը ներկայացվելու օրվանից հաշված 90 (իննսուն) աշխատանքային օր, ինչով պայմանավորված Հանձնաժողովը՝ Կարգի 41-րդ կետի համաձայն, որոշել է կասեցնել նիստը և առաջարկել Մասնակցին մեկ աշխատանքային օրվա ընթացքում շտկել առկա անհամապատասխանությունը:

Հանձնաժողովի 03.09.2020թ.-ի նիստի թիվ 3 արձանագրության համաձայն՝ «Տ-Քնսթրաքշն» ՓԲԸ-ն 31.08.2020թ.-ին ծանուցվել է առկա անհամապատասխանությունը շտկելու վերաբերյալ և մինչև ս.թ սեպտեմբերի 1-ը պարտավոր էր շտկել անհամապատասխանությունը: Սակայն «Տ-Քնսթրաքշն» ՓԲԸ-ի կողմից շտկված փաստաթղթերը ներկայացվել են 02.09.2020թ.-ին, ժամը 10:59-ին: Հետևաբար, Կարգի 42-րդ կետի համաձայն, եթե մասնակիցը սահմանված ժամկետում չի շտկում առկա անհամապատասխանությունը, ապա հայտը գնահատվում է անբավարար և մերժվում է:

Հաշվի առնելով վերոգրյալը, Հանձնաժողովը որոշել է «Տ-Քնսթրաքշն» ՓԲԸ-ի հայտը մերժել և հաղթող (ընտրված) մասնակից ճանաչել հաջորդաբար տեղ զբաղեցրած մասնակցին:

«ԵԲ-ԳՀԱՇՁԲ-20/118» ծածկագրով գնանշման հարցման ընթացակարգի հրավերի թիվ 2 հավելվածով նախատեսված աշխատանքների կատարման օրացուցային գրաֆիկի համաձայն՝ աշխատանքների կատարման ժամկետ է սահմանվել պայմանագիրն ուժի մեջ մտնելուց հետո 60-րդ օրացուցային օրը ներառյալ:

Օրենքի 2-րդ հոդվածի 1-ին մասի 9-րդ կետի համաձայն՝ հայտի ապահովումը նշված օրենքով նախատեսված դեպքերում մասնակցի կողմից հայտով ստանձնած պարտավորությունների կատարումն ապահովող միջոց է:

Օրենքի 31-րդ հոդվածի 1-ին մասի համաձայն՝ հայտը, որը գնումների մասին ՀՀ օրենսդրությամբ սահմանված դեպքերում պարունակում է նաև հայտի ապահովումը, վավեր է մինչև սույն օրենքին համապատասխան պայմանագրի կնքումը, մասնակցի կողմից հայտը հետ վերցնելը, հայտի մերժումը կամ գնման ընթացակարգը չկայացած հայտարարվելը: Նշված դրույթը ներառված է նաև վերոհիշյալ ծածկագրով գնման ընթացակարգի Հրավերում:

Այսինքն վերոհիշյալ նորմերի ուժով հայտի ապահովման գործողության ժամկետը պետք է պակաս չլինի Օրենքին համապատասխան պայմանագրի կնքման, մասնակցի

կողմից հայտը հետ վերցնելու, հայտը մերժելու կամ գնման ընթացակարգը չկայացած հայտարարվելու ժամկետից:

Միաժամանակ գնումների մասին ՀՀ օրենսդրությամբ սահմանված են մասնակիցների հայտերի գնահատման, հաղթող մասնակցին որոշելու, անգործության, պայմանագիր կնքելու առավելագույն ժամկետները, որոնք գնանշման հարցման ընթացակարգի դեպքում կազմում են 30-60 օրացուցային օր: Ընդ որում սույն դեպքում, հարկ է նկատել, որ աշխատանքների կատարման ժամկետ է սահմանվել պայմանագիրն ուժի մեջ մտնելուց հետո 60-րդ օրացուցային օրը ներառյալ՝ հիմք ընդունելով Հրավերի թիվ 2 հավելվածով նախատեսված աշխատանքների կատարման օրացուցային գրաֆիկը: Սույն դեպքում, «Տ-Քնսթրաքշն» ՓԲԸ-ի կողմից Երևանի քաղաքապետարանի կողմից հայտարարված «ԵԲ-ԳՀԱՇՁԲ-20/118» ծածկագրով գնանշման հարցման ընթացակարգին մասնակցության հայտի հետ միաժամանակ ներկայացված «Հայբիզնես» ՓԲԸ-ի կողմից 26.08.2020թ.-ին տրամադրված թիվ 854-48 բանկային երաշխիքի սահմանված ժամկետն ավելին է, քան փաստացի կնքվելիք պայմանագրի ամբողջ ծավալով կատարման վերջնաժամկետը:

Տվյալ պարագայում, Բողոքներ քննող անձն փաստում է, որ գնահատող հանձնաժողովի նիստի թիվ 2 արձանագրության 4.1 կետով կայացրած՝ «Տ-Քնսթրաքշն» ՓԲԸ-ի կողմից ներկայացված բանկային երաշխիքում անհամապատասխանություն արձանագրելու և շտկում պահանջելու վերաբերյալ որոշումը չի բխում գնումների մասին ՀՀ օրենսդրությամբ սահմանված պահանջներից և միտված չէ ապահովելու գնումների և գնումների գործընթացի տնտեսող, արդյունավետ և օգտավետ իրականացմանն ու պայմանագրի կնքման նպատակով մասնակիցների շրջանակի ընդլայնմանը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում՝ Բողոքներ քննող անձը հանգում է այն եզրակացության, որ «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետով սահմանված պատասխանատվությունը չի կարող վրա հասնել ու հանգեցնել Մասնակցին՝ գնումների գործընթացին մասնակցելու իրավունք չունեցող մասնակիցների ցուցակում ընդգրկելուն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը՝

Ո Ր Ո Շ Ե Ց

ՀՀ ֆինանսների նախարարության կողմից 18.09.2020թ.-ի թիվ 26/26-1/14150-2020 գրությամբ «Տ-Քնսթրաքշն» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ՍՑ-ԼՕ-2020/215 ծածկագրով ընթացակարգը մերժել:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ՝**



ԼԵՎՈՆ ՕՇԱՆՅԱՆ